

沈雲龍編輯

明清史料彙編

集 三

第五冊

文海出版社
印行

明清史料彙編三集目錄

第五冊

孫愷陽先生殉城論	明·蔡鼎撰	二二九三
荆溪盧司馬殉忠錄	明·許德士著	二三〇一
汴園濕襟錄	明·白愚撰	二三九一
子遺錄	清·戴田有撰	二四八三
崇禎癸未榆林城守紀略	清·戴田有撰	二五五七
崇禎甲申保定城守紀略	清·戴田有撰	二五七九
甲申忠侯記事	明·錢邦芑記	二五九五
甲申紀變錄	明·錢邦芑輯	二六〇三
遇變記略	明·聶道人述	二六一三
滄州紀事	明·程正揆記	二六四三
僞官據城記	清·王度撰	二六七三
歷年城守記	清·王度撰	二六七九

北使紀略

明・陳洪範撰 二六八三

宏光朝僞東宮僞后及黨禍紀略

清・戴田有著 二七〇五

宏光乙酉揚州城守紀略

清・戴田有著 二七四九

孫愷陽先生殉城論

蔡鼎撰

王少司寇虞石公之哭高陽也曰崇禎十一年十一月十二日□□數萬南下薄高陽城愷陽先生率邑紳衿誓死登埤十三日一戰砲擊敵潰土城低脆外援不至敵晝夜環攻石盡矢竭力不能支先生守北門謂家人曰我死此爾輩可往逃生家人輩都不忍舍城旣陷敵以多部落掖之去先生求死不能至敵營罵曰□□我大臣家居城亡與

亡可急殺我□不忍加刃但令自便先生望關叩
頭以繩繫頸呼令□□絞之死子姪男婦百餘口
與奴婢俱被殺逃出者六歲孫與其母二口耳當
圍時城中眾數千及陷逃者不數十先生忠義之
感激烈哉或問於鼎曰先生可以無死卽死亦可
無闔門以死豈先生遂不及料之耶抑先生能料
之而不能避之耶鼎曰先生處無可避之地又不
能與家人以避之勢先生安之矣卽家人婦子輩
亦安之此所以爲先生也先生自度不可免而令

子若孫去先生以求免是以不孝令也先生願之
乎子若孫去先生以倖免而坐視先生以不免子
若孫願之乎在他人於此必生許多計較許多躲
閃以求萬一之或免至於必不可免而後已先生
不屑也先生安之矣家人婦子安先生之所安矣
或曰聖人無死地先生於此遂無以自完乎鼎曰
先生當已督師時舊經畧高第弁灤以逃先生雖
不暴其惡而實惡其懦先生殉城之志定於此矣
□來而朝廷或假以便宜使調度西南團練民壯

制敵深入此先生之能也而先生不能得也且耻
於苟得也故先生安之有地方軍旅之責者或念
其國家元老滿城赤子不可坐棄於敵而或護或
援得相犄角此先生之願也而先生不能得也且
不欲強得也故先生又安之安之以守鼓銳作氣
合數千人爲一死卒以抗十萬之強敵先生且身
先之矣圍城之內有圖脫者先生且以軍法行之
况家人婦子乎力盡援絕不濟而斃父死忠子死
孝婦女死節奴僕死主天地正氣萃於一門先生

甘之此先生之所謂自完也非今人之苟免倖生以謂完也以身之死與闔門之死奉功令而使天下之人無敢骹功令求苟免先生之以忠教也先生之所維持大矣先生以一身之死闔門之死維功令維世教明君臣父子夫婦兄弟無可苟免之人倫中外君子卒無一人爲先生表章以振末世苟免無恥之人心而誅白養粹賈維毓等不能死之徒於地下則中外之負先生深也匹夫匹婦自痛其父自痛其兄自痛其夫或自殉其主以死於

國毫未有涉也。司世教者必表章旌異之曰：若以
勵世也。先生之門子死，父死，兄婦死，夫奴死，主
者若殉所私，實許國也。以國死而及其私，與以私
死而無及於國者，勵世有間矣。司世教者無或表
章焉，豈特負先生哉？明以無益之死示天下而誨
之二，可乎哉？國家於閣臣有遣官護送之禮，於老
臣有遣官存問之禮，於大臣有遣官祭葬之禮，處
順猶然，況其變者乎？八十老人闔門死難，積屍涼
月，暴骨荒原，狐狼嗥其前，烏鳶嘯其上，慘何甚也。

守道巡方不言風聞豸繡不言閣臣禮臣不言門
生故吏不言僅僅徼一從重議卹之明旨豈惟國
體太褻將掩骼埋胔之皇仁不太傷乎天下不喜
言仗節死義之事與天下仗節死義之事不重於
世此天下國家之大患也異日封疆有事爲白養
粹賈維毓者執以藉口而高第者流亦何難以一
贖幸免卽百司馬日勵戰日勵守恐無所施之矣
鼎不悲先生之死而深悲先生之死不爲世重以
爲天下憂故論之於此

孫愷陽殉城論卷終

荆溪盧司馬殉忠錄

同邑許德士雪城父著

胞弟盧象觀幼哲父訂

樞督相左機緣

戊寅三月東師十萬騎臨宣邊盧公聞警夜馳邊
城右衛衛將士云□臨墻問撫挿舊員想係挿夷
求撫公數詰之始知東人挾插邀賞非眞挿也隨
卽繕疏馳奏疏云撫挿不撫□許市不許賞蓋因
□□□順不應言撫且其性甚□求撫亦非真情

插久歸之法難輕賞云云旬日樞部手書云撫之
便不觀卜夷往事究作熟眠之卧犬耶公乃榜示
東人俾復我侵地還我叛人而後議持議甚嚴樞
部又書來曰宜邊原插夷口子東人請撫應在義
州其意謂公不主撫他督可惟命□見公榜書嚴
正亦遂一旦遁去樞部慮邊事必壞勢將爲法罪
死倘撫事或就可幸苟免不則脫樞部一席斯離
惡塹遂力圖大拜當日以墨衰辦部務長安猶不
免訾議今且以衰經之身御紅袍登政府何俟都

人口誅恐楊公亦或內媿時石齋黃公廷諍面折
楊公相爭如虎因是黃公竟遭遠謫後幾斃杖獄
楊公亦可畏哉公亦馳手書諷之云變禮易制誠
非細事但使相業隆盛無愧救時亦或一道惟公
好爲之報書云某知決不議南陽李也公笑曰羅
倫復官應在何日蓋指石齋先生言也此時兩人
便已相左然使楊公得脫樞務卽相左亦或無害
詎意皇上命兼樞部因遺書賺公云某以病行矣
此座可惜惟公念之公笑曰楊公欺我未幾公以

外艱乞奔喪去楊公樞務終不獲解遂決許講撫
商通戎政授意薊門督監薊督監嗜飲強半在醉
夢之中唯唯而已後遂遣瞽奴賣卜者周元忠赴
東講撫因其與遼人熟識故遣之去□云此事重
大何無專官乃遣一廢疾者來直玩侮耳欲斬之
元忠曰此番未便講撫如議撫果成當有天使來
汝國也遂釋之都人憤其大傷國體而瑞屏顧公
延斥樞輔謂元忠不應遣復補牘糾之一時欽其
丰采樞輔心脚顧公後以他事中公革職而樞輔

持撫議益力都人謂樞璫已密請聖裁否則關寧
警報狎至薊門而鄧監日召諸帥悉赴幕中稱觴
上壽□卽於是日從牆子嶺入口鄧胆卽如斗大
敢擅縱敵入乎當日樞璫謂撫可成將論功受賞
寧料薊督未悉箇中遂致中解公督師入關輒聞
此報不禁撫膺心痛次日平臺召對公謂□入內
地傷重臣尙何撫之可言力議主戰皇上命與樞
臣及戎政總提協諸臣會商都人謂皇上受欺于
若輩也已可概見何用再商公特鑿鑿言戰絕不

作商量語此公之與樞左也將謂罪在公平然公禍實始此次日閣部入朝房就公議徹左右逾時無一言徒進勿浪戰三字而撫議終偪塞不能出口公乃挑選誓師樞部無計撓成遂疏稱□南下督臣猶擬趨牛欄票擬令督赴通與高監面商想商通高監令與公密諮撫意由主也此樞之與公左也將謂罪不在樞乎公開疏揭憤甚拍案擲去而公之禍益不可解自後樞部事事設陷公遂死嗟嗟寧惟公死而公死之後各藩衛省會盡燬周